


TEZAU LITURGIC

1 IULIE

SLUJBA SF. PREOT-MUCENIC ARCADIE GARIAEV DE LA BOROVSK



MOSCOVA, 2000



Служба

священномученику

Аркадию Гаряеву

На велицей вечерне

На Господи возвах: стихиры, глас 1.

Подобен: О, дивное чудо:

О, дивное чудо! / Небеса отверзахуся, / Ангели
схождаху, / взяти душу убиеннаго пастыря. /
Вси святии ликуют, / сомолитвенника
приобретше. / Церковь торжествует, /
прославляючи новомученика: / веселися и
радуйся! / Ибо рече Христос: / ныне многа мзда
твоя // в Небесных обителях.

Дивны святии Твои, Господи! / И чудна дела
Твоя! / Сподоби нас, грешных, / восхвалити
угодника Твоего Аркадия, / слово Твое
проповедавшего, / и за веру Православную
пострадавшего. / Мы же недостойными усты
соборне воспеваем: / веселися и радуйся, /
пастырю ревностный! / Ибо многа мзда твоя //
в Небесных обителях.

Днесь память совершаем / страсотерпца
Аркадия. / Молятся людие, / к раце мощей его
притекающе / в нуждах и скорбех, / в бедах и
болезнях. / Не остави чад своих, / с любовию

поющих ти: / веселися и радуйся, / верный
слуго Христов! / Се бо многа мзда твоя // в
Небесных обителях.

Ины стихиры, глас 4.

Подобен: Дал еси знамение:

Дал еси знамение / любящим Тя, Господи! /
Мощи угодника Твоего Аркадия, / в сем храме
Жертву Святую приносившаго, / и к Престолу
Владычню / молитвы возносившаго. / Ныне к
честней раце Его припадаем, / и усердно
взываем: / священномучениче Аркадие! // моли
спастися душам нашим.

Приидите, людие, / похвалы приносяще /
нашему заступнику, / православному пастырю,
/ ревнителю веры, / во дни гонений лютейших /
Истину соблюдающему. / Днесь вернии рцем: /
священномучениче Аркадие! // Моли спастися
душам нашим.

Что воздамы Господеви, / яже воздаде нам?! /
Се бо во обители Пресвятыя Владычицы /
почивают мощи святого мученика. / Приидите,
священницы, / монаси и простии, / помолимся
пред образом / страсотерпца Аркадия: / о,
угодниче Божий! // Моли спастися душам
нашим.

Слава, глас 6.

Подобен: Тридневен:

Даровал еси, Господи, / верному слуге Твоему /
Царство Нетленное / и блаженство вечное, / и
ныне прими моление / страстотерпца
Российскаго / за род наш развращенный и
неверный, / да не лишимся Твоя милости, // и
сподобимся благ вечных.

И ныне, глас тойже, догматик: Кто Тебе не
ублажит:

(аще суббота, уходящего гласа, от больших)

Стихиры на литии, глас 6.

Подобен: Все отложше:

Ревностный служителю Божий, / немощь свою
отложивший / и крест пастырский на рамена
взем, / языческая племена просвещая, /
неустанно трудился еси, / прославляя Имя
Христово. / Во дни же гонения лютаго, / не
убоялся еси убивающих тело, / души же не
могущих убить, / мученически за отеческую
веру пострадав. / Сего ради ныне, предстоя
Престолу Божию, / моли еже обители сей
утвержденней быти // и душам нашим
спастися.

Слава, глас 2:

Моли о нас, грешных, / страстотерпче Христов,
/ священномучениче Аркадие. / Вверенную ти

паству не оставивый, / и мученически за Христа
пострадавый. / Ныне на Небесех предстоиши
Святей Троице, / непрестанно воспевая // во
всех Славимаго Бога.

И ныне, глас тойже:

Молитвеннице теплая, / заступнице рода
христианскаго, / прими моления раб Твоих / и
осени Русь православную // покровом Твоея
благости.

Стихиры на стиховне, глас 4.

Подобен: Яко добля:

Яко доблий в мученицех, / страсотерпче
Аркадие, / веру Православную непорочно
соблюд, / муки жестокия даже до смерти
претерпев, / ныне в вечной славе пребываеши /
со всеми новомученики Российскими. / С
нимиже моли Преплагаго Господа / Русь Святую
в Православии утвердити // и спасти души
наша.

Стих: Священницы Твои облекутся в правду и
преподобнии Твои возрадуются.

Паству Твою добре упасл еси, / ревностно
служение свое совершая. / Верен был еси
Христу даже до крове, / священномучениче
Аркадие. / Сего ради уготовася ти венец
нетленный. / Моли о нас, грешных, /
почитающих память твою, / да избавит Господь

Отечество наше / от плена греховнаго / и люди
Российския // на путь правый наставит.

Стих: Честна пред Господем смерть
преподобных Его.

Священномучениче Аркадие, / во дни лютых
испытаний / исповедник веры показался еси, /
смерти же не убоявся. / Ныне Церковь Небесная
торжествует, и мы грешнии радостно
воспеваем: / слава Всещедрому Богу, //
Прославляющему Святыя Своя.

Слава, глас 1.

Подобен: Всехвальнии мученицы:

О, прехвальне священномучениче! / Тя ни земля
потаила есть, / но Небо прият тя. / Мы же
недостойнии обретохом Святыя мощи твоя, /
усердно просим: / Пресвятей Троице молися /
даровати обители нашей мир // и велию
милость.

И ныне, Богородичен.

Тропарь, глас 4:

Обновися яко орля служение твое, / дивный
священномучениче Аркадие, / делом и словом
послуживши Христу, / славную добычу подъял
еси, / Солнцу правды смерть добропобедную
принесе, / озаряя Урала концы, — // ниспосли
нам ревность веры и красотой любви окрыли.

Ин тропарь, глас 5:

Ревностный проповедниче / веры отеческия, /
Аркадие достохвальне, / тьму языческую
просвещал еси. / В годину жестоких гонений / в
Истине твердо стоя, / мученическую кончину
восприял. / Сего ради на Небесех предстоиши
Христу, / моли даровати людем Российским мир
// и велию милость.

На утрени

Седальны по первом стихословии, глас 5.

Подобен: Радуйся:

Воистину Ты, Христе, / апостолов похвало и
мучеников радование, / молитвами угодника
Твоего Аркадия, / проповедь Твою
совершившаго, / даруй нам в Истине //
непоколебимое утверждение.

Стих: Дивен Бог во Святых Своих, Бог
Израилев.

Ревностный исповедниче Божий, /
страстотерпче Аркадие, / взывал еси к
мученикам святым, / заступления прося, /
Христос же укрепи тя, / и подвиг твой прият. /
Ныне в вечной славе со всеми святыми
молишися о нас, // совершающих память твою.

Слава и ныне, Богородичен:
Молитвами, Господи, рождшия Тя, и святых
апостол Твоих, и священномученика Аркадия,
просвети наша сердца, еже воспевати Тя в
веселии и славити Имя Твое во веки.

Седальны по втором стихословии, глас 1.

Подобен: Всехвальнии мученицы:

О, прехвальне священномучениче! /
Пострадавый и увенчавыйся, / Троицу
Единосущную исповедуя, / ныне хвалу Творцу
воспеваеши радуяся. / Не остави нас
унывающих и немощных, / скорбьми века сего
отягченных. / Буди нам помощник и
молитвенник // за Отечество твое земное.

Стих: Блажен муж, бояйся Господа, в заповедех
Его восхощет зело.

Тесноту и скорби понесл еси, / клевету
человеческую претерпевая, / стопы своя
направляя по Слову Христову, / заповеди
Божии верно храня. / Ныне зриши селения
Небесная, / идеже несть печаль ни въздыхание.
/ Умоли милосердаго Бога, / да умирит
церковныя раздоры, / пастырей в вере укрепит,
/ во еже право ходити наставит, / и всем людем
православным // любовь и единомыслие дарует.

Слава и ныне, Богородичен:

Творца ангелов и человеков на объятиях носила еси, Пречистая, даровала еси спасение миру, Христа Бога нашего, темже Тя вси роди ублажают. Не остави землю Русскую теплым заступлением Твоим.

По полиелее седален, глас 6:

Не риторскою мудростию прославился еси, / но верою крепкою и пламенною ревностию ты Бог обогати, / Аркадие пастырю наш. / Моли убо Пастыреначальника Христа, / да не отлучимся малаго стада // и ко избранным овцам причислени будем.

Слава, и ныне, Богородичен:

Единая Всепетая, / Пресвятая Владычице Богородице, / мертвии Тобою оживляются, / грешнии очищаются / и бедствующии помощь обретают. / Буди нам покров и заступница в День Судный. / Умоли Праведнаго Судию, / да предстательством Твоим / и всех новомученик Российских // подаст нам велию милость.

Стихира по 50-м псалме, глас 6:

Пастырю милостивый, / кроткий наш предстателю, / ревностный исповедниче Христов, / священномучениче Аркадие, / Истину проповедал еси, яко учитель веры, / от

безбожных поругание приял еси. / Бог же прослави тя в сонме избранных Своих // и исповедника Церкви Русския яви.

Канон священномученика Аркадия, глас 8, егоже краегранесие: Радуйся, Аркадие, Христов славный мучениче.

Песнь 1.

Ирмос: Воду прошед, яко сушу, и египетскаго зла избежав, израильтянин вопияше:

Избавителю и Богу нашему поим.

Рака мощей твоих, мучениче Христов Аркадие, свидетельствует яве, яко на Небесех в сонме Новомучеников и исповедников Российских вселился еси и на земли поклонения сподобился еси.

Апостольскому житию подражая, священниче Божий, не своих си иский, но Божий глагол провозвещая, даже до края страны Уральския достигл еси и во тьме сущия языки просветил еси.

Достойно восхвалим, вернии, мученическую кончину Господня проповедника, егоже смерть не разлучи от любве Божия, сию мужественне претерпевшаго и вождеденнаго Царствия достигшаго.

Богородичен: Утверждение на Тя надеющихся,
Богородице Дево, крепость и силу подавай нам
ради Рождшагося от Тебе, Владычице.

Песнь 3.

Ирмос: Утверждей на камени веры, на сем
созижду Мою церковь, рекий Господи, спаси мя,
вопиюща: Ты Еси, Христе, Сын Бога Живаго, и в
Тебе утверждается дух мой.

Измлада в благочестии воспитанный, на
крепком камене веры житие твое утвердил еси,
темже в час кончины твоея Господом
укрепленный, николиже поколебался еси.

Святому алтарю предстоя, о иерею Христов,
умом в горняя возносился еси, идеже мучеников
собор пред Святым Божиим Престолом вопиет,
ихже число дополнити достойным явил еси себе,
священномучениче.

Яко сосуду благодати Божия, припадем, вернии,
к мощем мученика Христова Аркадия, за паству
свою усердно молящагося и к Единому Пастырю
сию приводящаго.

Богородичен: Аркадия, молитвенника страны
Уральския, ходатая пред Тобою имамы,
Пречистая Мати Дево, с нимже сподоби и нас
достойно взывати Тебе: радуйся, Невесто
Неневестная.

Седален, глас 6:

Не убойтеся от убивающих тело, души же не могущих убить, рече Господь. Сими словесы укрепляемь, тело твое на смерть уготовал еси, священномучениче, душу же живу сохранив, со Христом во Царствии Небеснем пребываеши.

Песнь 4.

Ирмос: Услышах, Господи, смотрения Твоего таинство, разумех дела Твоя и прославих Твое Божество.

Русския земли красное прозябение, плод зрелый винограда Христова, житием твоим и кончиною веру истинную свидетельствовал еси, темже рая Божия украшением явился еси.

К мучеником святым, добре страдальчествовавшим и венчавшимся, воспевал еси в день кончины твоея, Таинство Венчания совершая, ихже молитвами укреплен быв, добре страдания претерпел еси и венцем победным украсился еси.

Аще и умерщвлен был еси телом, священномучениче Аркадие, обаче духом козни диавольския посрамил еси, имея Христа своею силою и крепостию.

Богородичен: Державою Твоею Церковь нашу во дни гонений сохранила еси, Мати Дево, сего

ради и на будущее время от враг видимых и не видимых буди нам присная заступнице.

Песнь 5.

Ирмос: От ночи неведения Боговедением просветивый концы, просвети мя утром человеколюбия Твоего, Господи.

Истинный Свет возлюбил еси, отче Аркадие, егоже Един Господь показывает. Сего ради во стране полунощной, тьмою язычества омраченной, подвизался еси, да воссияет и тамо Свет Христов, всех просвещаяй.

Единому Богу послужити желая, славы мирской и почестей бегая, в пустыни духовней, Истиннаго Бога не ведающей, вселился еси, на неблагодарныя и злыя росу благодати от Христа излиая еси.

Христу Богу нашему утренююще, со святым священномучеником Аркадием возопиим, да озарит любовью души наша и от мрака греховнаго воззовет нас, многонемощных.

Богородичен: Радуйся, Благодатная Богородице Дево, прилежно вопием Ти, Владычице, избави нас от плена греховнаго и всякаго прилога вражия, сохрани от восстающих на ны, Ты бо еси Заступница рода Христианскаго.

Песнь 6.

Ирмос: Яко воды морския, Человеколюбче, волнами житейскими обуреваюся, темже, яко Иона, тако вопию Ти: возведи от тли живот мой, Благоутробне Господи.

Имя Божие во спасение твое призывая, от тли свободился еси, темже о нас моли, святой мучениче Аркадие, да и мы житейскаго моря волны неврежденно преидем и со Христом пребудем, тлю смертную отрясше.

Свидетельство любви жертвенныя ко Христу явил еси, священномучениче, ранами уязвленное честное тело твое, и быв верен Богу даже до смерти, венец жизни от Него приял еси. Телеси твоему глумляхуся и честному погребению его претяху злочестивии людие, смерти лютой тя предавшии, не имяху власти над душою твоею и оставлени быша посрамлени во злобе своей.

Богородичен: О Царице Державная, верных покрове, к Тебе прибегаем, на Тя надежду возлагаем спасения нашего, Пресвятая Владычице Богородице, не презри нас.

Кондак, глас 3. Подобен: Дева днесь: Днесь Церковь Русская духовно восхваляет воина Христова. Ангели пастыря возносят, мы же земнороднии воспевает: О, угодниче Божий!

Священномучениче Аркадие, испроси отечеству твоему земному в Истине утверждения, да с тобою славим Превечнаго Бога.

Песнь 7.

Ирмос: Подражатели триех Твоих, Господи, отроков сотвори ны, сопротивляющияся греху, и огонь страстей попирающия, и поющия:

Благословен еси, Боже отец наших.

Во огни мучений исповедницы Российстии, верою укрепляемии, яко отроцы в Вавилоне иногда, не сгараху, с нимиже и ты, священномучениче Аркадие, ныне ликуеши и воспеваеши: благословен еси, Боже отец наших. Святой Аркадие, сподоби нас, немощных и грешных, молитвами твоими от пламене страстей избавитися и от искушений невредимы сохранитися, Господеви взывающе: благословен еси, Боже отец наших.

Лютых дней горнилом испытан быв и огнем осолився, яко истинное чадо Божие Христом обретен еси, Емуже поеши: благословен еси, Боже отец наших.

Ангел земли Уральския явился еси в житии твоём, священномучениче, и по смерти ныне пред Богом предстоиши, за ны ходатайствуя. нас же вкупе призывая пети с тобою Богу: благословен Еси.

Богородичен: Всесвятая Владычице, оживи ум наш, умерщвленный страстьми многими, и укрепи ны богоугодная творити, да величаем Тя, яко заступницу рода христианскаго.

Песнь 8.

Ирмос: Победители мучителя и пламене благодатию Твоею бывше, заповедем Твоим зело прилежаще, отроцы вопияху: Благословите вся дела Господня Господа.

Ныне обретохом небеснаго заступника, немощи наша и нужды ведающаго. тойже, сам искушен быв, нам во искушении помощник есть.

Истиннаго Слова служителю ревностный, от Христа Бога дар словесный получил еси, имже в писаниях, речениях и проповеданиях твоих вооружен быв, паству свою к воплощенному Слову приводил еси.

Многими ранами уязвленное честное тело твое, кровию истекшее, яко свидетельство любви жертвенныя ко Христу явил еси, священномучениче, и быв верен Ему даже до смерти, венец жизни от Него приял еси.

Устами твоими, отче Аркадие, Господь в Церкви Своей проповедаше, и сею Силою укреплен, льстивых уста заградил еси, внемда к отречению тя подвигаху и глумляхуся.

Богородичен: Чтуция тя, неискусомужная
Марие, от враг видимых и невидимых избави,
ты бо еси земли отцев наших Держава
необоримая.

Песнь 9.

Ирмос: Величаем Тя, Матерь Божию, и славим
Тя, Богородице Дево, яко Спаса рождшую душ
наших.

Еже любити Христа и Ему служити, Аркадие
святе, делом и словом исполнил еси, образ быв
верным словом и житием, и самою кончиною
твоею.

Настави нас, пастырю ревностный, ревности по
Бозе, да не скончаются дние наша в
теплохладности погибельной.

Исполнил еси лета долга, скончався в мале, отче
святый, в меру возраста Христова пришедши,
восхищен быв, не престани молитися о нас,
грешных.

Человеколюбца Христа моли, отче Аркадие, да
помилует и спасет души наша.

Богородичен: Едина Спаса миру рождшая, Мати
Божия, нас, грешных, от падений огради,
Божественное же учение Церкви Святыя в
сердцах наших укрепи.

Хвалитны стихиры на 4, глас 1.

Подобен: Небесных чинов:

Ангели Божии дивляхуся / мужеству крепкому /
и тяжким страданием твоим, / достохвальне
Аркадие. / Предстатель буди пред Богом / о
чадах твоих немощных, / да сохранит Церковь
Свою // в любви и единомыслии. (Дважды)
Двери Небесныя / восприяша новомученика, /
плоти своей не пощадившаго, / жизнь за веру
положившаго. / Иерею Божий, страстотерпче
Христов, / венцем нетленным увенчавыйся, /
ты бо ныне с мученики на Небеси // жизнь
вечную приобрел еси.

На Небесех предстоящи, / прими молитвы чад
твоих, / и даждь исполнение прошением zde
ныне собравшихся, / моляся Пречистой
Владычице // спастися от всяких зол душам
нашим.

Слава, глас 8.

Подобен: О, преславнаго чудесе:

О, Троице Пресвятая, / предстательством новаго
страстотерпца / не остави нас грешных, / в
бездне страстей погибающих, / и от сна лени
призови к покаянию, / да сподобимся со
святыми сродники нашими / Вечныя благодати
Твоя // и жизни блаженныя.

И ныне, Богородичен, глас тойже:

О, преславнаго чудесе:

